जापु साहिब

१६ सितिगुर प्रसादि॥

स्री वाहिगुरू जी की फतह॥

जापु

स्री मुखवाक पातिशाही १०॥

छपै छंद ॥ त्व प्रसादि ॥

चक्र चिहन अरु बरन जाति अरु पाति नहिन जिह ॥ रूप रंग अरु रेख भेख कोऊ किह न सकति किह ॥ अचल मूरति अनभउ प्रकास अमितोजि किहजै ॥ कोटि इंद्र इंद्राणि साहु साहाणि गणिजै ॥ त्रिभवण महीप सुर नर असुर नेत नेत बन त्रिण कहत ॥ तव सरब नाम कथै कवन करम नाम बरनत सुमति ॥१॥

भुजंग प्रयात छंद॥

नमसत्वं अकाले ॥ नमसत्वं क्रिपाले ॥ नमसतं अरूपे ॥ नमसतं अनूपे ॥२॥ नमसतं अभेखे ॥ नमसतं अलेखे ॥ नमसतं अकाए ॥ नमसतं अजाए ॥३॥ नमसतं अगंजे ॥ नमसतं अभंजे ॥ नमसतं अनामे ॥ नमसतं अठामे ॥४॥ नमसतं अकरमं ॥ नमसतं अधरमं ॥

नमसतं अनामं ॥ नमसतं अधामं ॥५॥ नमसतं अजीते ॥ नमसतं अभीते ॥ नमसतं अबाहे ॥ नमसतं अढाहे ॥६॥ नमसतं अनीले ॥ नमसतं अनादे ॥ नमसतं अछेदे ॥ नमसतं अगाधे ॥७॥ नमसतं अगंजे ॥ नमसतं अभंजे ॥ नमसतं उदारे ॥ नमसतं अपारे ॥८॥ नमसतं स् एकै ॥ नमसतं अनेकै ॥ नमसतं अभूते ॥ नमसतं अजूपे ॥९॥ नमसतं निकरमे ॥ नमसतं निभरमे ॥ नमसतं न्रिदेसे ॥ नमसतं न्रिभेसे ॥१०॥ नमसतं न्रिनामे ॥ नमसतं न्रिकामे ॥ नमसतं न्रिधाते ॥ नमसतं न्रिघाते ॥११॥ नमसतं न्रिधृते ॥ नमसतं अभूते ॥ नमसतं अलोके ॥ नमसतं असोके ॥१२॥ नमसतं नितापे ॥ नमसतं अथापे ॥ नमसतं त्रिमाने ॥ नमसतं निधाने ॥१३॥ नमसतं अगाहे ॥ नमसतं अबाहे ॥ नमसतं त्रिबरगे ॥ नमसतं असरगे ॥१४॥ नमसतं प्रभोगे ॥ नमसतं स्जोगे ॥ नमसतं अरंगे ॥ नमसतं अभंगे ॥१५॥ नमसतं अगमे ॥ नमसतसतु रमे ॥ नमसतं जलासरे ॥ नमसतं निरासरे ॥१६॥ नमसतं अजाते ॥ नमसतं अपाते ॥ नमसतं अमजबे ॥ नमसतसत् अजबे ॥१७॥ अदेसं अदेसे ॥ नमसतं अभेसे ॥ नमसतं न्रिधामे ॥ नमसतं न्रिबामे ॥१८॥ नमो सरब काले ॥ नमो सरब दिआले ॥ नमो सरब रूपे ॥ नमो सरब भूपे ॥१९॥

नमो सरब खापे ॥ नमो सरब थापे ॥ नमो सरब काले ॥ नमो सरब पाले ॥२०॥ नमसतसत् देवै ॥ नमसतं अभेवै ॥ नमसतं अजनमे ॥ नमसतं सु बनमे ॥२१॥ नमो सरब गउने ॥ नमो सरब भउने ॥ नमो सरब रंगे ॥ नमो सरब भंगे ॥२२॥ नमो काल काले ॥ नमसतसत् दिआले ॥ नमसतं अबरने ॥ नमसतं अमरने ॥२३॥ नमसतं जरारं ॥ नमसतं क्रितारं ॥ नमो सरब धंधे ॥ नमो सत अबंधे ॥२४॥ नमसतं निसाके ॥ नमसतं निबाके ॥ नमसतं रहीमे ॥ नमसतं करीमे ॥२५॥ नमसतं अनंते ॥ नमसतं महंते ॥ नमसतसत् रागे ॥ नमसतं सुहागे ॥२६॥ नमो सरब सोखं ॥ नमो सरब पोखं ॥ नमो सरब करता ॥ नमो सरब हरता ॥२७॥ नमो जोग जोगे ॥ नमो भोग भोगे ॥ नमो सरब दिआले ॥ नमो सरब पाले ॥२८॥

चाचरी छंद॥ त्व प्रसादि॥

अरूप हैं ॥ अनूप हैं ॥ अजू हैं ॥ अभू हैं ॥२९॥ अलेख हैं ॥ अभेख हैं ॥ अनाम हैं ॥ अकाम हैं ॥३०॥ अधे हैं ॥ अभे हैं ॥ अजीत हैं ॥ अभीत हैं ॥३१॥ त्रिमान हैं ॥ निधान हैं ॥ त्रिबरग हैं ॥ असरग हैं ॥३२॥ अनील हैं ॥ अनादि हैं ॥ अजे हैं ॥ अजादि हैं ॥३३॥ अजनम हैं ॥ अबरन हैं ॥ अभूत हैं ॥ अभरन हैं ॥३४॥ अगंज हैं ॥ अभंज हैं ॥ अझूझ हैं ॥ अझंझ हैं ॥३५॥ अमीक हैं ॥ रफ़ीक हैं ॥ अधंध हैं ॥ अबंध हैं ॥३६॥ निव्रझ हैं ॥ असूझ हैं ॥ अकाल हैं ॥ अजाल हैं ॥३७॥ अलाह हैं ॥ अजाह हैं ॥ अनंत हैं ॥ महंत हैं ॥३८॥ अलीक हैं ॥ न्रिसीक हैं ॥ न्रिल्मभ हैं ॥ अस्मभ हैं ॥३९॥ अगम हैं ॥ अजम हैं ॥ अभूत हैं ॥ अछूत हैं ॥४०॥ अलोक हैं ॥ असोक हैं ॥ अकरम हैं ॥ अभरम हैं ॥४१॥ अजीत हैं ॥ अभीत हैं ॥ अबाह हैं ॥ अगाह हैं ॥४२॥ अमान हैं ॥ निधान हैं ॥ अनेक हैं ॥ फिर एक हैं ॥४३॥

भुजंग प्रयात छंद॥

नमो सरब माने ॥ समसती निधाने ॥ नमो देव देवे ॥ अभेखी अभेवे ॥४४॥ नमो काल काले ॥ नमो सरब पाले ॥ नमो सरब गउणे ॥ नमो सरब भउणे ॥४५॥ अनंगी अनाथे ॥ न्रिसंगी प्रमाथे ॥ नमो भान भाने ॥ नमो मान माने ॥४६॥ नमो चंद चंदे॥ नमो भान भाने॥ नमो गीत गीते ॥ नमो तान ताने ॥४७॥ नमो निरत निरते ॥ नमो नाद नादे ॥ नमो पान पाने ॥ नमो बाद बादे ॥४८॥ अनंगी अनामे ॥ समसती सरूपे ॥ प्रभंगी प्रमाथे ॥ समसती बिभूते ॥४९॥ कलंकं बिना ने कलंकी सरूपे॥ नमो राज राजे स्वरं परम रूपे ॥५०॥ नमो जोग जोगे स्वरं परम सिधे॥ नमो राज राजे स्वरं परम ब्रिधे ॥५१॥ नमो ससत्र पाणे ॥ नमो असत्र माणे ॥ नमो परम गिआता ॥ नमो लोक माता ॥५२॥ अभेखी अभरमी अभोगी अभुगते॥ नमो जोग जोगे स्वरं परम जुगते ॥५३॥

नमो नित नाराइणे क्रूर करमे॥ नमो प्रेत अप्रेत देवे सुधरमे ॥५४॥ नमो रोग हरता॥ नमो राग रूपे॥ नमो साह साहं ॥ नमो भूप भूपे ॥५५॥ नमो दान दाने ॥ नमो मान माने ॥ नमो रोग रोगे नमसतं इसनानं ॥५६॥ नमो मंत्र मंत्रं ॥ नमो जंत्र जंत्रं ॥ नमो इसट इसटे ॥ नमो तंत्र तंत्रं ॥५७॥ सदा सचदानंद सरबं प्रणासी॥ अनूपे अरूपे समसतुलि निवासी ॥५८॥ सदा सिधदा बुधदा ब्रिध करता ॥ अधो उरध अरधं अघं ओघ हरता ॥५९॥ परम परम परमेस्वरं प्रोछ पालं॥ सदा सरबदा सिध दाता दिआलं ॥६०॥ अछेदी अभेदी अनामं अकामं॥ समसतो पराजी समसतसतु धामं ॥६१॥

तेरा जोरु ॥ चाचरी छंद ॥

जले हैं ॥ थले हैं ॥ अभीत हैं ॥ अभे हैं ॥ ॥६२॥ प्रभू हैं ॥ अजू हैं ॥ अदेस हैं ॥ अभेस हैं ॥६३॥

भुजंग प्रयात छंद ॥

अगाधे अबाधे ॥ अनंदी सरूपे ॥ नमो सरब माने ॥ समसती निधाने ॥६४॥ नमसत्वं न्निनाथे ॥ नमसत्वं प्रमाथे ॥ नमसत्वं अगंजे ॥ नमसत्वं अभंजे ॥६५॥ नमसत्वं अकाले ॥ नमसत्वं अपाले ॥ नमो सरब देसे ॥ नमो सरब भेसे ॥६६॥ नमो राज राजे ॥ नमो साज साजे ॥ नमो शाह शाहे ॥ नमो माह माहे ॥६७॥ नमो गीत गीते ॥ नमो प्रीत प्रीते ॥ नमो रोख रोखे ॥ नमो सोख सोखे ॥६८॥ नमो सरब रोगे ॥ नमो सरब भोगे ॥ नमो सरब जीतं ॥ नमो सरब भीतं ॥६९॥ नमो सरब गिआनं ॥ नमो परम तानं ॥ नमो सरब प्रंत्रा ॥ नमो सरब जंत्रं ॥७०॥ नमो सरब द्रिसं ॥ नमो सरब क्रिसं ॥ नमो सरब रंगे ॥ त्रिभंगी अनंगे ॥७१॥ नमो जीव जीवं ॥ नमो बीज बीजे ॥ अखिजे अभिजे ॥ समसतं प्रसिजे ॥७२॥ क्रिपालं सरूपे ॥ कुकरमं प्रणासी ॥ सदा सरबदा रिधि सिधं निवासी ॥७३॥

चरपट छंद ॥ त्व प्रसादि ॥

अम्रित करमे ॥ अ्मब्रित धरमे ॥
अखल जोगे ॥ अचल भोगे ॥७४॥
अचल राजे ॥ अटल साजे ॥
अखल धरमं ॥ अलख करमं ॥७५॥
सरबं दाता ॥ सरबं गिआता ॥
सरबं भाने ॥ सरबं माने ॥७६॥
सरबं भाणं ॥ सरबं त्राणं ॥
सरबं भुगता ॥ सरबं जुगता ॥७७॥
सरबं देवं ॥ सरबं भेवं ॥
सरबं काले ॥ सरबं पाले ॥७८॥

रूआल छंद ॥ त्व प्रसादि ॥

आदि रूप अनादि मूरति अजोनि पुरख अपार॥ सरब मान त्रिमान देव अभेव आदि उदार॥ सरब पालक सरब घालक सरब को पुनि काल ॥ जत्र तत्र बिराजही अवधूत रूप रिसाल ॥७९॥ नाम ठाम न जात जाकर रूप रंग न रेख ॥ आदि पुरख उदार मूरति अजोनि आदि असेख॥ देस और न भेस जाकर रूप रेख न राग ॥ जत्र तत्र दिसा विसा हुइ फैलिओ अनुराग ॥८०॥ नाम काम बिहीन पेखत धाम हूं नहि जाहि॥ सरब मान सरबत्र मान सदैव मानत ताहि॥ एक मूरति अनेक दरसन कीन रूप अनेक॥ खेल खेल अखेल खेलन अंत को फिर एक ॥८१॥ देव भेव न जानही जिह बेद अउर कतेब॥ रूप रंग न जाति पाति सु जानई किह जेब ॥ तात मात न जात जाकरि जनम मरन बिहीन ॥ चक्र बक्र फिरै चत्र चक मानही पुर तीन ॥८२॥ लोक चउदह के बिखै जग जापही जिह जाप॥ आदि देव अनादि मूरति थापिओ सबै जिह थाप॥ परम रूप पुनीत मूरति पूरन पुरखु अपार ॥ सरब बिस्व रचिओ सुय्मभव गड़न भंजनहार ॥८३॥ काल हीन कला संजुगति अकाल पुरख अदेस ॥ धरम धाम स् भरम रहित अभूत अलख अभेस ॥ अंग राग न रंग जाकह जाति पाति न नाम ॥ गरब गंजन दुसट भंजन मुकति दाइक काम ॥८४॥ आप रूप अमीक अन उसतति एक पुरख अवधूत ॥ गरब गंजन सरब भंजन आदि रूप असूत॥ अंग हीन अभंग अनातम एक पुरख अपार ॥ सरब लाइक सरब घाइक सरब को प्रतिपार ॥८५॥ सरब गंता सरब हंता सरब ते अनभेख ॥

सरब सासत्र न जानही जिह रूप रंग अरु रेख ॥ परम बेद पुराण जाकहि नेत भाखत नित ॥ कोटि सिम्रिति पुरान सासत्र न आवई वहु चिति ॥८६॥

मधुभार छंद ॥ त्व प्रसादि ॥

गुन गन उदार ॥ महिमा अपार ॥
आसन अभंग ॥ उपमा अनंग ॥८७॥
अनभउ प्रकास ॥ निसदिन अनास ॥
आजान बाहु ॥ साहान साहु ॥८८॥
राजान राज ॥ भानान भान ॥
देवान देव ॥ उपमा महान ॥८९॥
इंद्रान इंद्र ॥ बालान बाल ॥
रंकान रंक ॥ कालान काल ॥९०॥
अनभूत अंग ॥ आभा अभंग ॥
गति मिति अपार ॥ गुन गन उदार ॥९१॥
मुनि गन प्रनाम ॥ निरभै निकाम ॥
अति दुति प्रचंड ॥ मिति गति अखंड ॥९२॥
आलिस्य करम ॥ आद्रिस्य धरम ॥
सरबा भरणाढय ॥ अनडंड बाढय ॥९३॥

चाचरी छंद॥ त्व प्रसादि॥

गोबिंदे ॥ मुकंदे ॥ उदारे ॥ अपारे ॥९४॥ हरीअं ॥ करीअं ॥ न्निनामे ॥ अकामे ॥९५॥

भुजंग प्रयात छंद॥

चत्रू चक्र करता ॥ चत्रू चक्र हरता ॥ चत्रू चक्र दाने ॥ चत्रू चक्र जाने ॥९६॥ चत्रू चक्र वरती ॥ चत्रू चक्र भरती ॥ चत्रू चक्र पाले ॥ चत्रू चक्र काले ॥९७॥ चत्रू चक्र पासे ॥ चत्रू चक्र वासे ॥ चत्रू चक्र मानयै ॥ चत्रू चक्र दानयै ॥९८॥

चाचरी छंद॥

न सत्रै ॥ न मित्रै ॥ न भरमं ॥ न भित्रै ॥९९॥ न करमं ॥ न काए ॥ अजनमं ॥ अजाए ॥१००॥ न चित्रै ॥ न मित्रै ॥ परे हैं ॥ पवित्रै ॥१०१॥ प्रिथीसै ॥ अदीसै ॥ अद्रिसै ॥ अक्रिसै ॥१०२॥

भगवती छंद ॥ त्व पर्रादि कथते ॥

कि आछिज देसै ॥ कि आभिज भेसै ॥ कि आगंज करमै ॥ कि आभंज भरमै ॥१०३॥ कि आभिज लोकै ॥ कि आदित सोकै ॥ कि अवधूत बरनै ॥ कि बिभूत करनै ॥१०४॥ कि राजं प्रभा हैं॥ कि धरमं धुजा हैं॥ कि आसोक बरनै ॥ कि सरबा अभरनै ॥१०५॥ कि जगतं क्रिती हैं ॥ कि छत्रं छत्री हैं ॥ कि ब्रहमं सरूपै ॥ कि अनभउ अनुपै ॥१०६॥ कि आदि अदेव हैं॥ कि आपि अभेव हैं॥ कि चित्रं बिहीनै ॥ कि एकै अधीनै ॥१०७॥ कि रोज़ी रज़ाकै ॥ रहीमै रिहाकै ॥ कि पाक बिऐब हैं ॥ कि ग़ैबुल ग़ैब हैं ॥१०८॥ कि अफवुल गुनाह हैं ॥ कि शाहान शाह हैं ॥ कि कारन कुनिंद हैं ॥ कि रोज़ी दिहंद हैं ॥१०९॥ कि राज़क रहीम हैं॥ कि करमं करीम हैं॥ कि सरबं कली हैं ॥ कि सरबं दली हैं ॥११०॥

कि सरबत्र मानियै ॥ कि सरबत्र दानियै ॥ कि सरबत्र गउनै ॥ कि सरबत्र भउनै ॥१११॥ कि सरबत्र देसै ॥ कि सरबत्र भेसै ॥ कि सरबत्र राजै ॥ कि सरबत्र साजै ॥११२॥ कि सरबत्र दीने ॥ कि सरबत्र लीने ॥ कि सरबत्र जाहो ॥ कि सरबत्र भाहो ॥११३॥ कि सरबत्र देसै ॥ कि सरबत्र भेसै ॥ कि सरबत्र कालै ॥ कि सरबत्र पालै ॥११४॥ कि सरबत्र हंता ॥ कि सरबत्र गंता ॥ कि सरबत्र भेखी ॥ कि सरबत्र पेखी ॥११५॥ कि सरबत्र काजै ॥ कि सरबत्र राजै ॥ कि सरबत्र सोखै ॥ कि सरबत्र पोखै ॥११६॥ कि सरबत्र त्राणै ॥ कि सरबत्र प्राणै ॥ कि सरबत्र देसै ॥ कि सरबत्र भेसै ॥११७॥ कि सरबत्र मानियें ॥ सदैवं प्रधानियें ॥ कि सरबत्र जापियै ॥ कि सरबत्र थापियै ॥११८॥ कि सरबत्र भाने ॥ कि सरबत्र माने ॥ कि सरबत्र इंद्रै ॥ कि सरबत्र चंद्रै ॥११९॥ कि सरबं कलीमै ॥ कि परमं फ़हीमै ॥ कि आकल अलामै ॥ कि साहिब कलामै ॥१२०॥ कि हुसनल वजू हैं ॥ तमामुल रुजू हैं ॥ हमेसुल सलामैं ॥ सलीखत मुदामैं ॥१२१॥ ग़नीमुल शिकसतै ॥ ग़रीबुल परसतै ॥ बिलंदुल मकानैं ॥ ज़मीनुल ज़मानैं ॥१२२॥ तमीज़ुल तमामैं ॥ रुजूअल निधानैं ॥ हरीफुल अजीमैं ॥ रज़ाइक यकीनैं ॥१२३॥ अनेकुल तरंग हैं ॥ अभेद हैं अभंग हैं ॥ अज़ीज़्ल निवाज़ हैं ॥ ग़नीमुल ख़िराज हैं ॥१२४॥ निरुकत सरूप हैं ॥ त्रिमुकति बिभूत हैं ॥

प्रभुगति प्रभा हैं ॥ सु जुगति सुधा हैं ॥१२५॥ सदैवं सरूप हैं ॥ अभेदी अनूप हैं ॥ समसतो पराज हैं ॥ सदा सरब साज हैं ॥१२६॥ समसतुल सलाम हैं ॥ सदैवल अकाम हैं ॥ निवाध सरूप हैं ॥ अगाधि हैं अनूप हैं ॥१२७॥ ओअं आदि रूपे ॥ अनादि सरूपे ॥ अनंगी अनामे ॥ त्रिभंगी त्रिकामे ॥१२८॥ त्रिबरगं त्रिबाधे ॥ अगंजे अगाधे ॥ सुभं सरब भागे ॥ सु सरबा अनुरागे ॥१२९॥ त्रिभुगत सरूप हैं ॥ अछिज हैं अछूत हैं ॥ कि नरकं प्रणास हैं ॥ प्रिथीउल प्रवास हैं ॥१३०॥ निरुकति प्रभा हैं ॥ सदैवं सदा हैं ॥ बिभुगति सरूप हैं ॥ प्रजुगति अनूप हैं ॥१३१॥ निरुकति सदा हैं ॥ बिभुगति प्रभा हैं ॥ अनुराने अनूप हैं ॥१३२॥ निरुकति सदा हैं ॥ बिभुगति प्रभा हैं ॥

चाचरी छंद॥

अभंग हैं ॥ अनंग हैं ॥ अभेख हैं ॥ अलेख हैं ॥१३३॥ अभरम हैं ॥ अकरम हैं ॥ अनादि हैं ॥ जुगादि हैं ॥१३४॥ अजै हैं ॥ अबै हैं ॥ अभूत हैं ॥ अधूत हैं ॥१३५॥ अनास हैं ॥ उदास हैं ॥ अधंध हैं ॥ अबंध हैं ॥१३६॥ अभगत हैं ॥ बिरकत हैं ॥ अनास हैं ॥ प्रकास हैं ॥१३७॥ निचिंत हैं ॥ सुनिंत हैं ॥ अलिख हैं ॥ अदिख हैं ॥१३८॥ अलेख हैं ॥ अभेख हैं ॥ अढाह हैं ॥ अगाह हैं ॥१३९॥ अस्मभ हैं ॥ अग्मभ हैं ॥ अनील हैं ॥ अनादि हैं ॥१४०॥ अनित हैं ॥ सुनित हैं ॥ अजात हैं ॥ अजाद हैं ॥१४१॥

चरपट छंद ॥ त्व प्रसादि ॥

सरबं हंता ॥ सरबं गंता ॥ सरबं खिआता ॥ सरबं गिआता ॥१४२॥ सरबं हरता ॥ सरबं करता ॥ सरबं प्राणं ॥ सरबं त्राणं ॥१४३॥ सरबं करमं ॥ सरबं धरमं ॥ सरबं जुगता ॥ सरबं मुकता ॥१४४॥

रसावल छंद ॥ त्व प्रसादि ॥

नमो नरक नासे ॥ सदैवं प्रकासे ॥ अनंगं सरूपे ॥ अभंगं बिभूते ॥१४५॥ प्रमाथं प्रमाथं ॥ सदा सरब साथे ॥ अगाध सरूपे ॥ निबाध बिभूते ॥१४६॥ अनंगी अनामे ॥ त्रिभंगी त्रिकामे ॥ निभंगी सरूपे ॥ सरबंगी अनूपे ॥१४७॥ न पोत्रै न पुत्रै ॥ न सत्रै न मित्रै ॥ न तातै न मातै ॥ न जातै न पातै ॥१४८॥ निसाकं सरीक हैं ॥ अमितो अमीक हैं ॥ सदैवं प्रभा हैं ॥ अजै हैं अजा हैं ॥१४९॥

भगवती छंद ॥ त्व प्रसादि ॥

कि ज़ाहर ज़हूर हैं ॥ कि हाज़र जज़ूर हैं ॥ हमेसुल सलाम हैं ॥ समसतुल कलाम हैं ॥१५०॥ कि साहिब दिमाग़ हैं ॥ कि हुसनल चराग़ हैं ॥ कि कामल करीम हैं ॥ कि राज़क रहीम हैं ॥१५१॥ कि रोज़ी दिहिंद हैं ॥ कि राज़क रहिंद हैं ॥ करीमुल कमाल हैं ॥ कि हुसनल जमाल हैं ॥१५२॥ ग़नीमुल ख़िराज हैं ॥ ग़रीबुल निवाज़ हैं ॥ हरफ़िुल शिकंन हैं ॥ हिरासुल फिकंन हैं ॥१५३॥ कलंकं प्रणास हैं ॥ समसतुल निवास हैं ॥
अगंजुल गनीम हैं ॥ रज़ाइक रहीम हैं ॥१५४॥
समसतुल जुबां हैं ॥ कि साहिब किरां हैं ॥
कि नरकं प्रणास हैं ॥ बहिसतुल निवास हैं ॥१५५॥
कि सरबुल गवंन हैं ॥ हमेसुल रवंन हैं ॥
तमामुल तमीज़ हैं ॥ समसतुल अज़ीज़ हैं ॥१५६॥
परं परम ईस हैं ॥ समसतुल अदीस हैं ॥
अदेसुल अलेख हैं ॥ हमेसुल अभेख हैं ॥१५७॥
ज़मीनुल ज़मा हैं ॥ अमीकुल इमा हैं ॥
करीमुल कमाल हैं ॥ कि जुरअति जमाल हैं ॥१५८॥
कि अचलं प्रकास हैं ॥ कि अमितो सुबास हैं ॥
कि अनितो पसा हैं ॥ कि अमितो बिभूत हैं ॥१५९॥
कि अमितो पसा हैं ॥ कि अमितो अभंग हैं ॥१६०॥

मधुभार छंद ॥ त्व प्रसादि ॥

मुनि मनि प्रनाम ॥ गुनि गन मुदाम ॥
अरि बर अगंज ॥ हिर नर प्रभंज ॥१६१॥
अन गन प्रनाम ॥ मुनि मनि सलाम ॥
हिर नर अखंड ॥ बर नर अमंड ॥१६२॥
अनभव अनास ॥ मुनि मनि प्रकास ॥
गुनि गन प्रनाम ॥ जल थल मुदाम ॥१६३॥
अनछिज अंग ॥ आसन अभंग ॥
उपमा अपार ॥ गित मिति उदार ॥१६४॥
जल थल अमंड ॥ दिस विस अभंड ॥
जल थल महंत ॥ दिस विस बिअंत ॥१६५॥
अनभव अनास ॥ ध्रित धर धुरास ॥
आजान बाहु ॥ एकै सदाहु ॥१६६॥

ओअंकार आदि ॥ कथनी अनादि ॥ खल खंड खिआल ॥ गुरबर अकाल ॥१६७॥ घर घरि प्रनाम ॥ चित चरन नाम ॥ अनछिज गात ॥ आजिज न बात ॥१६८॥ अनझंझ गात ॥ अनरंज बात ॥ अनटुट भंडार ॥ अनठट अपार ॥१६९॥ आडीठ धरम ॥ अति ढीठ करम ॥ अणब्रण अनंत ॥ दाता महंत ॥१७०॥

हरिबोलमना छंद ॥ त्व प्रसादि ॥

करुणालय हैं ॥ अरि घालय हैं ॥ खल खंडन हैं॥ महि मंडन हैं॥१७१॥ जगतेस्वर हैं ॥ परमेस्वर हैं ॥ कलि कारण हैं॥ सरब उबारण हैं॥१७२॥ ध्रित के धरण हैं ॥ जग के करण हैं ॥ मन मानिय हैं ॥ जग जानिय हैं ॥१७३॥ सरबं भर हैं॥ सरबं कर हैं॥ सरब पासिय हैं ॥ सरब नासिय हैं ॥१७४॥ करुणाकर हैं ॥ बिस्व्मभर हैं ॥ सरबेस्वर हैं ॥ जगतेस्वर हैं ॥१७५॥ ब्रहमंडस हैं॥ खल खंडस हैं॥ पर ते पर हैं ॥ करुणाकर हैं ॥१७६॥ अजपा जप हैं ॥ अथपा थप हैं ॥ अक्रिता क्रित हैं॥ अम्रिता म्रित हैं॥१७७॥ अम्रिता म्रित हैं ॥ करणा क्रित हैं ॥ अक्रिता क्रित हैं ॥ धरणी ध्रित हैं ॥१७८॥ अम्रितेस्वर हैं ॥ परमेस्वर हैं ॥ अक्रिता क्रित हैं ॥ अम्रिता म्रित हैं ॥१७९॥

अजबा क्रित हैं ॥ अम्रिता म्रित हैं ॥
नर नाइक हैं ॥ खल घाइक हैं ॥१८०॥
बिस्व्मभर हैं ॥ करुणालय हैं ॥
निप नाइक हैं ॥ सरब पाइक हैं ॥१८१॥
भव भंजन हैं ॥ अरि गंजन हैं ॥
रिपु तापन हैं ॥ जपु जापन हैं ॥१८२॥
अकलं क्रित हैं ॥ सरबा क्रित हैं ॥
करता कर हैं ॥ हरता हरि हैं ॥१८३॥
परमातम हैं ॥ सरब आतम हैं ॥
आतम बस हैं ॥ जस के जस हैं ॥१८४॥

भुजंग प्रयात छंद ॥

नमो सूरज सूरजे नमो चंद्र चंद्रे॥ नमो राज राजे नमो इंद्र इंद्रे॥ नमो अंधकारे नमो तेज तेजे॥ नमो बिं्रद बिं्रदे नमो बीज बीजे ॥१८५॥ नमो राजसं तामसं सांत रूपे॥ नमो परम ततं अततं सरूपे॥ नमो जोग जोगे नमो गिआन गिआने॥ नमो मंत्र मंत्रे नमो धिआन धिआने ॥१८६॥ नमो जुध जुधे नमो गिआन गिआने॥ नमो भोज भोजे नमो पान पाने ॥ नमो कलह करता नमो सांत रूपे॥ नमो इंद्र इंद्रे अनादं बिभूते ॥१८७॥ कलंकार रूपे अलंकार अलंके॥ नमो आस आसे नमो बांक बंके॥ अभंगी सरूपे अनंगी अनामे॥ त्रिभंगी त्रिकाले अनंगी अकामे ॥१८८॥

एक अछरी छंद॥

अजै ॥ अलै ॥ अभै ॥ अबै ॥१८९॥
अभू ॥ अजू ॥ अनास ॥ अकास ॥१९०॥
अगंज ॥ अभंज ॥ अलख ॥ अभख ॥१९१॥
अकाल ॥ दिआल ॥ अलेख ॥ अभेख ॥१९२॥
अनाम ॥ अकाम ॥ अगाह ॥ अढाह ॥१९३॥
अनाथे ॥ प्रमाथे ॥ अजोनी ॥ अमोनी ॥१९४॥
न रागे ॥ न रंगे ॥ न रूपे ॥ न रेखे ॥१९५॥
अकरमं ॥ अभरमं ॥ अगंजे ॥ अलेखे ॥१९६॥

भुजंग प्रयात छंद॥

नमसतुल प्रणामे समसतुल प्रणासे ॥
अगंजुल अनामे समसतुल निवासे ॥
निकामं बिभूते समसतुल सरूपे ॥
कुकरमं प्रणासी सुधरमं बिभूते ॥१९७॥
सदा सचिदानंद सत्रं प्रणासी ॥
करीमुल कुनिंदा समसतुल निवासी ॥
अजाइब बिभूते गजाइब गनीमे ॥
हरीअं करीअं करीमुल रहीमे ॥१९८॥
चत्र चक्र वरती चत्र चक्र भुगते ॥
सुय्मभव सुभं सरबदा सरब जुगते ॥
दुकालं प्रणासी दिआलं सरूपे ॥
सदा अंग संगे अभंगं बिभूते ॥१९९॥

वाहिगुरू जी का खालसा वाहिगुरू जी की फतह॥